



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum die Jovis decimâ-quintâ
Decembris M. DCC. XL.

M. LEANDRO PEAGET,
Doctore Medico Præside.

*An Musculorum intercostalium & Diaphragmatis actio partim vo-
luntaria, partim spontanea.*

L



RESPIRATIONI exercendæ duplicem principem facultatem mireris insumptam, vitalem scilicet & animalem, tantæ molis fuit, hanc numeris absolvere organorum compagem quâ fruimur ducti emissique spiritûs usurâ. Quot partes ad eosdem usus & munia conspirantes! Quot organa figurâ, mole, structurâ, usu à se invicem abludentia! Hic vita à cerebello oriundis virium copiis agit, & sibi quasi sedula invigilat; illic voluntas supremæ intelligen-

A

tia particeps, suis à cerebro aut medullâ spinali habentis instructa, cuncta moderatur aut urget; rationis legibus, prudentique mentis consilio respirationis negotium natura exequitur. Absit tamen credas juxta mentis quandoque depravatæ & cæcutientis imperium cuncta componi; nihil immutat nisi in melius, nec immutare potest ipsamet voluntas: utile artificium quo respiratorii motus, nonnisi ad commune totius corporis emolumentum, accelerantur aut retardantur! Pertinacem suspicias Musculorum respirationis, in reciprocandas contractiones & relaxationes, ipsomet animali mortuo, proclivitatem; adeò affabrè ad motus qui vitam faciunt ingeminandos constructa fuit animalium machina. Motu dilatationis & contractionis Thoracem cieri nemo negaverit. Dilatationem Thoracis partim voluntariam, partim spontaneam, musculis validissimis exerceri, demonstrant in contrarium renitentia ossa, ligamenta, muscoli, cartilagine, viscera abdominis.

I I.

THORAX osseus, suâ peculiari structurâ firmus, antrorsum, sursum & lateraliter fornicatus, posticè longior est. Latus ipsius geminum absolvunt segmenta ossæ duodecim, longitudine & crassitie, varia; costæ nuncupantur, septem in singulo quoque latere veræ, quinque spuræ. Videas sic disposita segmenta, ut limbis suis in eandem lineam verticalem non coincident, mollibus pulmonum lobis, musculis thoracis, ferratis majoribus, aliisque præbeant amplam superficiem, à parte posticâ versùs anticam, obliquâ nec non ad horizontalem lineam, accedente tramite, efferantur. Capitulo, duplici impressione articulari, obsignato, recipiuntur in fossulis, quas in corporibus duarum vertebrarum provida natura insculpsit. Scater asperitatibus circumferentia capituli, ligamentis ipsum cum vertebis copulantibus, commodam insertionem datura. Capitulum insidet parti angustiori collum dictæ, quam excipit corpus, interjecto tamen tuberculo, partim lævigato, ut cum processu transverso vertebræ dorsalis, articulari nexu cohæreat; partim aspero, ut mediantibus ligamentis, cohæreat firmius. Tum corpus costæ, extrorsum obliquâ lineâ, quam angulum vocaverunt Anatomici, asperum hicque loci gibbum magis, mutatâ subito directione, quasi introrsum deflectit, in ampliorem excurrit superficiem geminam, externam convexam, internam concavam: utramque definiunt limbus duplex, supernus, rotundior & crassior, infernus acutior, crenâ introrsum sulcatus primum profundiore,

dein versùs partem mediam corporis, evanescēte. Demùm corpus à parte posticâ in anticam rectiùs excurrens, parùmper in aliam dimensionem contorquetur, ita ut extremâ facie internâ deorsum parùmper respiciat, licet capitulum mox descriptum suâ internâ parte sursum parùmper dirigatur: hinc, si plano horizontali costæ integrè alteruter limbus, incumbit, nonnisi alterutra extremitas plano contigua admovebitur. Extremitas anterior fossulâ excavatur. Duplicem hanc hemiciclorum seriem firmant posticè, ex viginti-quatuor spinæ vertebris, speciales duodecim, piramidem, antrorsum concavam amulantes, corpore, septem processibus, foraminibus lateralibus, canalicque magno; quadrantes cum reliquis, ab his verò discrepantes, & parte cylindricâ antrorsum minùs in rotunditatem conformatâ; processibus transversis crassioribus, longis, capitatis, asperis, posticè reclinatis, articulari facie obsignatis; spinis acutioribus, longioribus, sibi invicem insistentibus, deorsum directo apice; processibus obliquis, facie articulari, quasi ad perpendicularum positâ; expolitis; corpore quatuor impressionibus articularibus excavato, juncturâ ferè immobili cum vicinis nexo. Thoracem antrorsum circumscribunt, sternum, & tot cartilagine quot costæ. Septem supremæ cartilagine in utroque latere, ut costæ, breves, ferè horizontaliter à duabus primis costis ad sternum tendunt, omnes ex ordine à primis costis usque ad septimas longiores per gradus fiunt, & exceptis duabus superioribus, sursum obliquè à costis ad sternum ascendendo, procedunt, convexum limbum, deorsum, concavum, sursum dirigentes. Extremitatibus sterno coherētib, acutiores deprehenduntur, in extremis costarum cavitatibus, crassioribus extremis infixæ. Cartilagine quæ à tribus primis costis spuris procedunt, junctis in unum extremis, ultimæ verarum costarum cartilagini adhærescunt. Primæ costæ spurie cartilago major cartilagine infrâ sequenti, secunda tertiâ major est, tandem ultimarum costarum cartilagine omnium minimæ, nec mediocri à se distantes intervallo deprehenduntur. Sternum thoracem antrorsum absolvit, totamque ipsius hâc parte emittitur longitudinem, sicque disponitur, ut extremitas inferior longè ultrâ superiorem antrorsum promineat. Ossibus constat plurimis in fœtibus, in infantibus septem aut sex, in adultis tribus, in senibus unicum os sæpissime observatur. Duplici instructum cernitur extremo, superiore crassiore, impressione articulari duplici, cum claviculis juncto, tuberculis duobus per fossulam sejunctis, aspero, inferiore, acutiore, modò ensi formi, modò bifariam diviso, in adultis quadoque cartilagineo. Facie donatur anteriore convexâ, interiore con-

cavâ, utrâque fibrâ lacertosis cartilaginâ nexum firmantibus adornatâ. Latus duplex obtinet septem cavitatibus, limbo asperâ & prominente cinctis, cartilagine costarum admittentibus excavatum. Sic se habent ossæ partes quibus stat thoracis compages has validissimis ligamentis secum invicem nexas, nemo nisi Anatomia rudis negaverit. Nonnisi à momento virium maximo tot cartilaginum ligamentorumque renixum, tot ossium pondus specificum superandum esse, ne dubites. Musculorum decem abdominalium, triangularium sterni in contrarium renitentium, integumentorum communium thoracis & abdominis, mammarum, musculorum pectoralium & serratorum, viscerum abdominis, agentibus decem musculis abdominalibus, intropulsorum, ingentem resistentiam & pondus, facili Marte vincendum quis judicaverit?

III.

TOT posse superari obices vix credas, si organa hæc, quæ costarum intercapedines claudunt, attentus non examina-veris. In ratione resistentiarum, multiplicari virium momenta, thoracemque, mobilis repaguli utili privilegio à supremo rerum opifice fuisse instructum, facile judicaveris. Duplex in distantia duarum costarum observes stratum carneum, internum & externum; internum, musculos intercostales internos, externum, externos constituit. Utrumque duplici cujusque costæ limbi margini tam crebrâ insertione annectitur, ut vix punctum assignaveris, quod fibris motricibus brevibus quidem at numerosissimis, insertionem non præbeat, aut originem. Etenim musculi intercostales externi oriuntur & ex apice processus transversi cujusque dorsi vertebræ, & ex omni puncto marginis externæ limbi inferioris cujusque costæ, obliquiori propè vertebra, juxta sternum minus obliquo tramite descendunt omnes, atque inseruntur margini externæ limbi superioris qui ad costam infra sequentem pertinet, ita tamen ut quidam ipsam faciem externam cujusque costæ parumper retegant. Musculi intercostales interni, breviores, quia minus obliqui sunt, ab ipsomet sterno & cartilagine omnis costæ inferioris orti, oblique ascendentes, inseruntur margini inferiori costæ superioris. Hos ab externis interpositâ membranâ lacertosâ, cellulis obductâ, sejunctos, facile observaveris. Nec externos ad sternum usque, nec internos ultrâ angulum costæ exporrectos percipies. Musculis intercostalibus socios se adjungunt elevatoræ *Stenonij*. Hi ex apice & ligamento processus transversi cujusque

5

vertebræ orti, oblique antrorsum procedentes & latiores facti, fibrisque suis cum intercostalibus inplexi, limbo superiori primæ costæ inferioris quandoque & secundæ, inseruntur. Costas & his appensa corpora tot musculis agentibus elevari non verò deprimi, judicaveris, si primam costam, brevi, crassâ, vix mobili cartilagine donatam, à musculo scaleno firmatam, vix moveri, costas verò inferiores longiori instructas cartilagine ad morum esse aptiores observaveris. Intercostales internos & externos eidem scopo simul inservire facile tibi suadeas, iisdem enim costis & eodem prorsus modo, variâ tantum directione, inseruntur. At quia externi à vertebreis sumentes exordium, ultrâ extremitates osseas costarum antrorsum non tendunt, interni verò, à sterno & cartilaginibus procedunt, nec ad vertebrae usque exporriguntur, duplicem in singulâ costâ vectem intelligas, quæ naturæ nostras investigationes quasi fugientis, artificium revelat. Obliquitas costarum minor tempore dilatationis, quam tempore constrictionis, solvit problema, cur contractis musculis intercostalibus spatia intercostalia augeantur. Quis verò tam numerosis ad eundem scopum collimantibus fibris, thoracem ut ut ponderosum in altum tolli negaverit? At septum quo pectoris & abdominis cava à se invicem discriminantur, examinati primo patet intuitu, cuncta in abdomine contenta deorsum validè premi invito ipsomet musculorum decem abdominalium elatere. Diaphragma musculus planus, ab extremitatibus partim osseis partim cartilagineis omnium costarum spuriarum, à cartilagine geminâ utriusque ultimæ ex veris, ab appendice Xiphoideâ, à processibus transversis vertebræ primæ lumborum, musculorum intercostalium transversorumque, abdominis fibris parumper in sua origine implexus, fibras digitatim insertas colligit, ipsasque radiatim convergentes ex omni puncto circum positi thoracis in aponevrosim quasi cordi formem, multiplici fibrarum tendinearum serie variegatam, foramine venam cavam transmittente pertusam, centrum nervosum dictam, quasi in unum compingit. At ex basi centri nervosi, hæc scilicet parte quâ centrum nervosum vertebrae respicit, oriuntur fibræ carneæ multiplices, sibi invicem superstratæ. Harum aliæ, breviores scilicet, corpori primæ & secundæ lumborum vertebræ inseruntur, aliæ verò longiores, duplicem in caudicem divisæ oblongum efformant foramen quo transmittitur stringiturque Œsophagus. Ex fibris sese invicem decussantibus aliisque, emergunt duo communia crura dextrum & sinistrum, sua divaricatione spurium efformantia foramen, quo mediante aorta ad abdominis cavum perducitur.

Illud, crassius longiusque, quatuor vertebrarum lumbarium supremis corporibus digitatim inferitur, primo carneum, dein magis ac magis tendineum; hoc verò, tenuius tribus inter vertebrae lumbarum ex costis emergentium contractione, deorsum viscera abdominis pelli multiplex autopsia evincit. Hæc de diaphragmatis structura & usu compendiosè dicta sufficiant, alias in thoracem agentes vires frustra investigaveris; hinc thoracem vel motu voluntario vel necessario dilatatum à solis musculis intercostalibus & diaphragmate agitari verè asserueris.

I V.

A NNUENTE voluntate, altius & diutius thoracem dilatari nobis ipsis sumus conscii. Ne quid de suo jure detractum diutius velis, ipsa à te sunt experimenta iterari, voluntas. Utere concessis. lente & per gradus, vel celeriter recipe aut mitte spiritum; ex votis cuncta succedent. Hinc inspirationem voluntariam, momentis virium, inspirationi spontaneæ præpollere, quis non concludat? At excessus virium voluntatis est ingens. Si dubites, profundius inspirare voluto, nec te diu fugiet gradus discriminis. An quia scaleni, subclavii, serrati antici majores, serrati postici superiores, pectoralesque, musculos intercostales virium numero superant. Sic judicabat præstantissimus Boerrhaavius. At horum situs, insertio, origo, directio, ipsos agitando thoraci parum efficaces demonstrant. Quid prodest speciales effingere musculos? Natura quæ ex causis simplicibus effectus in immensum varios elicit, iisdem musculis duplicem mandavit provinciam, qua posita motu spontaneo seu naturali & voluntario sive animali, thoracem agere sunt habiles. Quæ organa thoracem modo uniformi regulari motu ampliant, eadem ipsum dependenter à voluntate in motus gradu varios, vel lentum trahunt vel rapiunt præcipientem. Ergo ne implicat eundem musculum, ex fonte duplici, medulla spinali atque cerebello, suæ contractionis causam mutuari? Respirationem in functionem vitalem & animale[m] dividunt antiquiores Medici, hos ergò, quam probandam suscipimus veritas non latet, genuinam rationem haud assecutos. Musculorum intercostalium & diaphragmatis motu spontaneo & voluntario agentium effectus manent, nec ideo causas evolvere supervacaneum judicamus. Nervi medullæ spinalis motuum voluntariorum causam ubique impertiuntur. Musculi manûs utriusque & pedum,

capitis, dorſi, lumborum, ab iis ſanis & intactis ſui motus principium reperunt. Quæcumque pars carnea ab intercoſtali & octavo pari ſolis, nervos recipit, extra voluntatis aleam & imperium poſita eſt. Atqui muſculi intercoſtales recipiunt nervos ab intercoſtali nervo, & medullâ ſpinali; quot ſunt etenim geminata intercoſtaliū ſtrata, tot hiſ impenduntur nervorum dorſalium paria, & geminati ab intercoſtali prodeuntes funiculi. Quis ergò *ſpontaneitatis* ſimul & voluntatis inſtrumenta per muſculorum intercoſtaliū villos diſſeminata non agnoſcat? Ergò ſpontaneo & voluntario motu cieri poſſunt muſculi intercoſtales; at potentiam hanc, ut aiunt, ad actum realem redigi, nemo qui ſpirat negaverit. Quæ hætenus de muſculis intercoſtalibus dicta fuere, ea ſic de diaphragmate volumus intellecta, ut ab iisdem cauſis ipſum moveri, aſſerere: nihil dubitemus. A nervis dorſalibus circa extremitates coſtarum oriundos ſurculos digitationibus diaphragmatis impendi, docet Anatome. Ex ganglio ſeminari dextro unum aut alterum nervum aſſurgere, venæ cavæ inferioris trunco contiguum, diverſis inter aſcendendum gangliis interſectum, verâ anatoſi cum nervi diaphragmatici dextri ramis inſignibus copulari, ſæpiſſime nobis compertum eſt. Utriuſque nervi diaphragmatici cum intercoſtali communicationem aut in cervice, aut cavò pectoris demonſtrare non arduum. Tandem utrumque nervum diaphragmaticum ex cervicalium nervorum tertiâ, quartâ, interdum & quintâ, conjugationibus, ducere natalia notum eſt omnibus;

V.

NERVI itaque dorſales, necnon & cervicales quidam, voluntati interinſpirandum, famulantur. Ciendum eſſe violentiori motu thoracem tempore voluntatis efficaciter imperantis, evincunt nervi dorſales & diaphragmatici craſſiores intercoſtalibus, pluribus proinde ſucci nervei rivulis irrigati. Ab intercoſtali nervo emiſſum duplicem ſurculum contrahendis motu ſpontaneo muſculis intercoſtalibus parem eſſe, numerus nervorum cordis demonſtrat. Muſculorum ſcalenorum, ſerratorum ſuperiorum, actionem voluntariam, & intercoſtaliū motum naturalem, ſeu ſpontaneum ad inſpirationem voluntariam nullatenus conſpirantes iudicamus. At quorſum, inquiunt, motu ſpontaneo non aguntur muſculi pedis manûſque, licet ab intercoſtali quorſdam recipiant ſurculos? Si muſculos pedis manûſque motu ſpontaneo contrahi contingeret, certè huius actionis cauſam in intercoſtalem hiſ proſpicien-

tem refundere quis dubitet? At ex eo quod motu spontaneo caruerint musculi pedis manûsque, quis inferat in musculis, in quibus & motus & nervus percipitur, motum à nervo non esse repetendum? Motum spontaneum inspirationis eundem ac motum cordis jure dixeris. In corde ab intercostali fluit: cur non & in musculis intercostalibus? Pone cor motu voluntario cieri. Undenam hujus causam repetas? Nonne à communicantibus cum cervicalium familiâ nervis cardiacis? Existunt reipsâ communicationes, at ideò motum hunc esse realem non contendas. Sic ab intercostali cum nervis brachialibus communicante, spontaneo motu agendos esse musculos brachiales, absit concludere. In singulo quoque nervorum dorsalium fasciculo diversi generis excogites tubulos, hos ad causam motûs spontanei, illos voluntarii deferendam, propagandamque habiles. Numerosiores sunt voluntati inservientes tubuli; hinc vires voluntatis prævalentes agnoscas. Sic autem Verheyenus: (*) *Musculis respiratoriis provisum est de duplici nervorum serie, quorum alii ejusdem sunt prosapie cum illis, qui pulsui cordis, motu peristaltico, aliisque ejusmodi functionibus inserviunt: alii ex spinali medulla egredientes, pariter ac reliqui ab iisdem truncis oriundi pro voluntatis imperio spiritum recipiunt.*

Ergo Musculorum intercostalium & Diaphragmatis actio partim voluntaria, partim spontanea.

(*) Tract. II. de usu respirationis, Cap. VIII.

DOMINI DOCTORES DISPUTATURI.

M. Ludovicus-Guillelmus le Moanier.

M. Carolus Dignis.

M. Ludovicus l'Emery, Medicus Regis ordinarius, Regiæque Scientiarum Academiæ Socius, & in Horto Regio Chymicæ Professor.

M. Josephus-Exuperius Bertin.

M. Gedeon de Rabours.

M. Joannes-Ludovicus Baude de Lacroix.

M. Laurentius Ferrès.

*M. Petrus le Tonnelier.
M. Nicolaus Andry, antiquus Facultatis Decanus, & Lector Regius.*

Proponerebat Parisiis NATALIS-MARIA DE GEVIGLÂND, Parisinus, Baccalaureus Medicus, A. R. S. H. 1740, à sextâ ad meridiem.

Typis QUILLAU, Universitatis & Facultatis Medicinæ Typographi, 1740